

O'zbekiston Respublikasi Prezidentining 2018 yil 16 apreldagi "Diniy-ma'rifiy soha faoliyatini tubdan takomillashtirish chora-tadbirlari to'g'risida"gi PF-5416-sonli Farmoni haqida

Xalqimizga azal-azaldan xos bo'lgan ma'rifatparvarlik, bag'rikenglik, mehr-muruvvat, bunyodkorlik kabi ezgu fazilatlar va qadriyatlarimizni keng targ'ib qilish, jamiyatda ijtimoiy-ma'naviy muhit barqarorligini ta'minlashda diniy-ma'rifiy soha vakillarining o'rni va ishtirokini oshirish, 2017-2021 yillarda O'zbekiston Respublikasini rivojlantirishning beshta ustuvor yo'nalishi bo'yicha Harakatlar strategiyasiga muvofiq hamda O'zbekiston Respublikasi Prezidentining 2018 yil 16 apreldagi PF-5416-sonli Farmonining ijrosini ta'minlash maqsadida Vazirlar Kengashi **qaror qiladi**:

1. O'zbekiston Respublikasi Prezidentining 2018 yil 16 apreldagi "Diniy-ma'rifiy soha faoliyatini tubdan takomillashtirish chora-tadbirlari to'g'risida"gi PF-5416-sonli Farmoni ijro uchun rahbarlikka olinsin.

2. O'zbekiston Respublikasi Prezidentining mazkur Farmoni bilan:

a) Quyidagilar:

"jaholatga qarshi ma'rifat" ulug'vor g'oya asosida dinning asl insonparvarlik mohiyatini, ezgulik, tinchlik va insoniylik kabi fazilatlar azaliy qadriyatlarimiz ifodasi ekanligini keng yoritish va bu sohada ilmiy-ma'rifiy faoliyatni jadal tashkil etish;

islom va jahon tsivilizatsiyasiga bebaho hissa qo'shgan ajdodlarimizning boy madaniy merosini chuqur o'rganish asosida yoshlarning ongu tafakkurini shakllantirish;

dinni zo'ravonlik va qon to'kish bilan bir qatarga qo'yadigan buzg'unchi yot g'oyalarning asl mohiyati va maqsadlari haqida aholining, ayniqsa, yoshlarning xabardorlik darajasini oshirish;

jamiyatda milliy va diniy qadriyatlarimizga yot bo'lgan g'oyalarga nisbatan toqatsizlik muhitini shakllantirish;

jamiyatda bag'rikenglik, o'zaro hurmat, mehr-oqibat, tinchlik va totuvlikni, ijtimoiy-ma'naviy muhit barqarorligini ta'minlashda diniy-ma'rifiy soha vakillarining daxldorlik hissi va ishtirokini yanada oshirish;

diniy-ma'rifiy tashkilotlarning moddiy-texnika ta'minotini mustahkamlash, soha vakillari mehnatini munosib rag'batlantirish va ijtimoiy himoyasini kuchaytirish;

globallashuv sharoitida jamiyatimizdagi ijtimoiy-ma'naviy muhit barqarorligi va e'tiqod erkinligiga tahdid tug'dirishi mumkin bo'lgan omillarni barvaqt aniqlash va oldini olishga qaratilgan axborot-tahliliy faoliyatni kuchaytirish;

diniy va dunyoviy bilimlar uyg'unligini rivojlantirish asosida ta'lim sifatini oshirish, diniy-ma'rifiy sohada malakali kadrlarni tayyorlash, qayta tayyorlash va malakasini oshirishning yaxlit tizimini yaratish

diniy-ma'rifiy soha faoliyatini tubdan takomillashtirishning ustuvor yo'nalishlari etib belgilanganligi: .

b) Diniy-ma'rifiy soha faoliyatini tubdan takomillashtirish bo'yicha chora-tadbirlar dasturi 1-ilovaga muvofiq tasdiqlanganligi;

v) O'zbekiston Respublikasi Vazirlar Mahkamasi huzuridagi Din ishlari bo'yicha qo'mita tuzilmasida 15 ta shtat birligidan iborat **Diniy-ijtimoiy jarayonlarni o'rganish axborot-tahlil markazi** (keyingi o'rinlarda Markaz deb yuritiladi) tashkil etilganligi;

Markaz Din ishlari bo'yicha qo'mitaning axborot-tahliliy tuzilmasi hisoblanishi;

g) O'zbekiston Respublikasi Vazirlar Mahkamasi huzuridagi Din ishlari bo'yicha qo'mita, Oliy va o'rta maxsus ta'lim vazirligi, O'zbekiston musulmonlari idorasining O'zbekiston islom akademiyasi va O'zbekiston Respublikasi Vazirlar Mahkamasi huzuridagi Toshkent islom universiteti negizida **O'zbekiston xalqaro islom akademiyasini tashkil etish** to'g'risidagi taklifi ma'qullanganligi;

O'zbekiston musulmonlari idorasi va O'zbekiston Respublikasi Vazirlar Mahkamasi huzuridagi Din ishlari bo'yicha qo'mita muassisligidagi respublikadagi barcha islom ta'lim muassasalari faoliyatini o'quv-me'yoriy va o'quv-uslubiy jihatdan ta'minlash hamda muvofiqlashtirishni amalga oshirishi;

O'zbekiston Respublikasining Davlat byudjeti mablag'lari va qonunda taqiqlanmagan boshqa manbalar hisobidan moliyalashtirilishi;

huquq va majburiyatlar bo'yicha qayta tashkil etilayotgan O'zbekiston islom akademiyasining hamda Vazirlar Mahkamasi huzuridagi Toshkent islom universitetining huquqiy vorisi hisoblanishi belgilanganligi;

O'zbekiston xalqaro islom akademiyasi bitiruvchilariga umumta'lim maktablari, o'rta maxsus va oliy ta'lim muassasalarida sohaga tegishli fanlar bo'yicha pedagogik faoliyat bilan shug'ullanish huquqi berilganligi;

O'zbekiston Respublikasi Prezidentining 2017 yil 20 apreldagi PQ-2909-son "Oliy ta'lim tizimini yanada rivojlantirish chora-tadbirlari to'g'risida"gi qarorining 14-bandida belgilangan imtiyozlar O'zbekiston xalqaro islom akademiyasiga ham tatbiq etilganligi;

O`zbekiston Respublikasi Vazirlar Mahkamasiga bir oy muddatda O`zbekiston xalqaro islom akademiyasi faoliyatini tashkil etish va qo`llab-quvvatlash to`g`risidagi qarorni qabul qilish topshirilganligi;

d) O`zbekiston xalqaro islom akademiyasi tarkibida Qoraqalpog`iston Respublikasi, Samarqand, Namangan va Surxondaryo viloyatlari mintaqaviy filiallariga ega bo`lgan Malaka oshirish markazi tashkil etilishi inobatga olinganligi;

Malaka oshirish markazi va uning mintaqaviy filiallarida imom-xatiblar, imom noiblari, diniy soha mutaxassislari, davlat va jamoat tashkilotlari xodimlari, oliy va o`rta ta`lim muassasalarining sohaga tegishli pedagog kadrlari qayta tayyorgarlikdan o`tishi va malaka oshirishi;

O`zbekiston Respublikasi Vazirlar Mahkamasiga bir oy muddatda O`zbekiston xalqaro islom akademiyasi Malaka oshirish markazi va uning mintaqaviy filiallari faoliyatini tashkil etish va qo`llab-quvvatlash to`g`risidagi qarorni qabul qilish topshirilganligi;

e) O`zbekiston xalqaro islom akademiyasi huzuridagi "Ziyo" media markazi mamlakatimizda dinning asl insonparvarlik mohiyatini, ajdodlarimizning islom va jahon tsivilizatsiyasiga qo`shgan boy diniy-ilmiy merosini keng targ`ib qiluvchi, diniy-ma`rifiy hayotdagi yangiliklarni jamoatchilikka etkazuvchi asosiy media tuzilma sifatida shakllantirilganligi;

O`zbekiston Respublikasi Vazirlar Mahkamasiga uch oy muddatda "Ziyo" media markazi ishini samarali tashkil etish maqsadida uni aloqa vositalari, keng qamrovli Internet tarmog`i, zamonaviy telestudiya, televizion uskunalar jamlanmasi, komp`yuter texnikalari, dasturiy ta`minot va boshqa texnika vositalari bilan ta`minlash choralarini ko`rish topshirilganligi;

"Ziyo" media markazi 2021 yilning 1 mayiga qadar belgilangan tartibda tasdiqlanadigan ro`yxatlar bo`yicha respublikada ishlab chiqarilmaydigan, zamonaviy telestudiya tashkil etish uchun zarur bo`lgan asbob-uskunalar, komp`yuter va server texnikasi, texnika vositalari, shuningdek, boshqa moddiy-texnika resurslarini olib kirish uchun bojxona to`lovlarini (bojxona rasmiylashtiruv uchun yig`imlar bundan mustasno) to`lashdan ozod etilganligi;

j) O`zbekiston Respublikasi Vazirlar Mahkamasi huzuridagi Din ishlari bo`yicha qo`mita, O`zbekiston musulmonlari idorasi va O`zbekistondagi Islom tsivilizatsiyasi markazining oliy diniy-ma`rifiy ta`lim muassasasi shaklidagi **Hadis ilmi maktabini tashkil etish** to`g`risidagi taklifi qabul qilinganligi;

Qur`oni karim va hadislarning asl mohiyatini, hadis ilmining ilmiy-nazariy asoslarini chuqur o`rgangan, hadis ilmi rivojiga beqiyos hissa qo`shgan ulug`vatandoshlarimizning ulkan ilmiy merosini puxta o`zlashtirgan, hadisshunoslik sohasida ilmiy izlanishlar olib borish ko`nikmasiga ega mutaxassislarni tayyorlash hamda hadislardagi ezgu umuminsoniy g`oyalarni xalqimiz, ayniqsa, yosh avlodga etkazish Hadis ilmi maktabining asosiy vazifalari etib belgilangan inobatga olinganligi;

O`zbekiston Respublikasi Vazirlar Mahkamasiga bir oy muddatda Hadis ilmi maktabi faoliyatini tashkil etish va qo`llab-quvvatlash to`g`risidagi qarorni qabul qilish topshirilganligi;

z) O`zbekiston musulmonlari idorasi huzuridagi Muqaddas qadamjolarini saqlash va obod etish xayriya jamoat fondi Vasiylik kengashi mazkur fondni tugatish to`g`risida qaror qabul qilganligi, O`zbekiston musulmonlari idorasi huzurida **"Vaqf" xayriya jamoat fondi tashkil etilganligi**, 2-ilovaga muvofiq ushbu jamoat fondining Vasiylik kengashi tarkibi ma`qullanganligi ma`lumot uchun qabul qilinganligi;

"Vaqf" xayriya jamoat fondining asosiy vazifalari etib quyidagilar belgilanganligi:

fuqarolarning diniy, ma`naviy va intellektual salohiyatini oshirishga qaratilgan tashabbuslarini qo`llab-quvvatlash, milliy va diniy qadriyatlarimizni asrab-avaylash;

masjidlar va diniy ta`lim muassasalarining binolarini qurish, ta`mirlash, rekonstruksiya qilish, obodonlashtirish, moddiy-texnik bazasini mustahkamlash;

tarixiy-me`moriy ahamiyatga ega ziyoratgohlarni saqlash, ta`mirlash, obodonlashtirish, ularning infratuzilmasini yanada rivojlantirish;

diniy ta`lim muassasalari, ilmiy-tadqiqot markazlari faoliyatini moliyalashtirish, ularning professor-o`qituvchilari, tadqiqotchilari, mutaxassislari va o`quvchi-talabalarini moddiy va ijtimoiy qo`llab-quvvatlash;

masjidlar va ziyoratgohlar xodimlarini, xususan imom-xatiblar, imom noiblari, mutavallilar, muazzinlarni moddiy va ijtimoiy qo`llab-quvvatlash;

islom ilm-fani va madaniyati rivojiga ulkan hissa qo`shgan buyuk ajdodlarimiz, zamonamizning etuk olim va ulamolari qalamiga mansub diniy-ma`rifiy asarlarni chop etish va aholiga etkazishga ko`maklashish;

yurtimizdagi muqaddas ziyoratgoh va qadamjolarining musulmon dunyosidagi nufuzini yanada oshirish, bu maskanlarga mahalliy va xorijiy fuqarolarning ziyoratlarini uyushtirish, ziyoratchilar uchun zarur sharoitlar yaratish;

aholining ijtimoiy himoyaga muhtoj qatlamlari, shu jumladan imkoniyati cheklangan shaxslarni moddiy va ma`naviy qo`llab-quvvatlash.

O`zbekiston Respublikasi Moliya vazirligi Axborot texnologiyalari va kommunikatsiyalarini rivojlantirish vazirligi, Vazirlar Mahkamasi huzuridagi Din ishlari bo`yicha qo`mita bilan birgalikda O`zbekiston musulmonlari idorasiga bir oy muddatda "Vaqf" xayriya jamoat fondining moliyaviy-xo`jalik faoliyatini tashkil etish, fuqarolardan zakot, fitr va boshqa xayriya mablag`lari sifatida tushadigan mablag`lar Fondning alohida hisob raqamida to`planishi, zamonaviy axborot texnologiyalaridan foydalangan (shu jumladan, Internet tarmog`i orqali onlayn kuzatish imkoniyatini yaratgan) holda mablag`larning tushishi va sarflanishida to`liq shaffoflikni ta`minlash bo`yicha amaliy ko`mak berish qayd etilganligi;

i) O`zbekiston Respublikasi Adliya vazirligi, Madaniyat vazirligi, Vazirlar Mahkamasi huzuridagi Din ishlari bo`yicha qo`mita, Davlat soliq qo`mitasi va O`zbekiston musulmonlari idorasi bilan birgalikda uch oy muddatda respublikadagi barcha muqaddas ziyoratgoh va qadamjolarini o`rganib chiqish hamda ularning tashkiliy-huquqiy asoslarini takomillashtirish bo`yicha aniq takliflar ishlab chiqib, Vazirlar Mahkamasiga kiritish topshirilganligi;

O`zbekiston Respublikasi Vazirlar Mahkamasiga 2018 yil 1 iyulga qadar o`rganish natijalari asosida muqaddas qadamjo va ziyoratgohlarni "Vaqf" xayriya jamoat fondiga foydalanish uchun ijaraga berish huquqi bilan biriktirib berishni nazarda tutuvchi qarorni qabul qilish topshirilganligi;

Muqaddas qadamjo va ziyoratgohlar moddiy madaniy meros ob`ektlari hisoblanishi hamda ularning talab darajasida muhofaza qilinishi ustidan O`zbekiston Respublikasi Madaniyat vazirligi tomonidan davlat nazorati o`rnatilishi;

k) O`zbekiston musulmonlari idorasining "Vaqf" xayriya jamoat fondi mablag`lari hisobidan ushbu idora tizimidagi diniy-ma`rifiy tashkilotlarda:

faoliyat yuritayotgan xodimlarga, shu jumladan imom-xatiblarga oylik ish haqi to`lash;

faoliyat yuritayotgan uy-joyga muhtoj xodimlarni xizmat uy-joylari bilan ta`minlash;

ko`p yillar davomida namunali faoliyat yuritayotgan, uy-joyga muhtoj imom-xatiblarga yangilangan namunaviy loyihalar bo`yicha qurilayotgan uy-joylarni sotib olib, tekinga berish to`g`risidagi taklifi qabul qilinganligi;

O`zbekiston Respublikasi Vazirlar Mahkamasi, Qoraqalpog`iston Respublikasi Vazirlar Kengashi, viloyatlar va Toshkent shahar hokimliklariga O`zbekiston musulmonlari idorasining buyurtmasiga asosan idora tizimidagi diniy-ma`rifiy tashkilotlar xodimlariga xizmat uy-joylari va ularga sotib olib berish uchun yangilangan namunaviy loyihalar bo`yicha qurilayotgan uy-joylarning ajratilishini ta`minlash topshirilganligi;

l) 2018 yil 1 iyuldan boshlab O`zbekiston Respublikasi Vazirlar Mahkamasi huzuridagi Din ishlari bo`yicha qo`mita, O`zbekiston xalqaro islom akademiyasi, O`zbekistondagi Islom tsivilizatsiyasi markazi, Imom Buxoriy xalqaro ilmiy-tadqiqot markazida ishlovchi:

o`qituvchi, ilmiy xodim va mutaxassislarga yagona tarif setkasi bo`yicha mehnatga haq to`lash razryadlariga ko`ra tarif koeffitsientlari va bazaviy lavozim maoshlari 3 baravar (Markaz xodimlariga - 4 baravar) miqdorda qo`llanilishi;

pensionerlarga ularning ushbu tashkilotlardagi faoliyati yagona bo`lgan taqdirda pensiyalari to`liq to`lanishi;

Mazkur bandning uchinchi xatboshisi barcha diniy-ma`rifiy tashkilotlar xodimlariga tatbiq etish belgilanganligi;

m) O`zbekiston Respublikasi Vazirlar Mahkamasi huzuridagi Din ishlari bo`yicha qo`mita, Fanlar akademiyasi, Ma`naviyat va ma`rifat markazi, O`zbekiston musulmonlari idorasi va keng jamoatchilikning islom ilm-fani va madaniyatiga beqiyos hissa qo`shgan buyuk ajdodlarimizning ibratli hayoti

va boy ilmiy merosini chuqur o`rganish, mamlakatimiz dovru`g`ini jahon miqyosida keng yoyish ishiga munosib hissa qo`shib kelayotgan shaxslarni rag`batlantirish maqsadida **"Imom Buxoriy" davlat mukofotini ta`sis etish** haqidagi taklifi qo`llab-quvvatlanganligi;

O`zbekiston Respublikasi Vazirlar Mahkamasiga bir oy muddatda mazkur davlat mukofotini ta`sis etish chora-tadbirlari to`g`risidagi tegishli normativ-huquqiy hujjat loyahasini kiritish topshirilganligi;

n) O`zbekiston Respublikasi Vazirlar Mahkamasi huzuridagi Din ishlari bo`yicha qo`mitaga Adliya vazirligi bilan birgalikda diniy-ma`rifiy sohada namunali faoliyat yuritayotgan, ijtimoiy-ma`naviy ishlarda alohida o`rnak ko`rsatayotgan soha vakillarini rag`batlantirish, shu jumladan davlat mukofotlariga taqdim etish bo`yicha takliflarni O`zbekiston Respublikasi Prezidenti devoniga kiritib borish topshirilganligi;

o) O`zbekiston Respublikasi Vazirlar Mahkamasi huzuridagi Din ishlari bo`yicha qo`mitaga:

bir hafta muddatda qo`mita faoliyatini takomillashtirish va uning yangilangan tuzilmasini tasdiqlash haqidagi O`zbekiston Respublikasi Prezidenti qarori loyahasini ishlab chiqish;

Adliya vazirligi va boshqa manfaatdor idoralar bilan birgalikdabir oy muddatda qonun hujjatlariga ushbu Farmondan kelib chiqadigan o`zgartish va qo`shimchalar to`g`risida O`zbekiston Respublikasi Vazirlar Mahkamasiga takliflar kiritish topshirilganligi ma`lumot uchun qabul qilinsin.

3. Qoraqalpog`iston Respublikasida diniy-ma`rifiy soha faoliyatini tubdan takomillashtirish bo`yicha chora-tadbirlar dasturi ilovaga muvofiq tasdiqlansin.

4. Qoraqalpog`iston Respublikasi Adliya vazirligi va boshqa manfaatdor vazirliklar, idoralar bilan birgalikda o`zlari qabul qilgan normativ-huquqiy hujjatlarni bir oy muddatda ushbu qarorga muvofiqlashtirilishini ta`minlasin.

5. Mazkur qarorning bajarilishini nazorat qilish Qoraqalpog`iston Respublikasi Vazirlar Kengashi Raisining o`rinbosarlari A.Tajetdinov, M.Jumanov, M.Aleuov zimmalariga yuklansin.

Qoraqalpog`iston Respublikasi

Vazirlar Kengashining Raisi

Q.Sariev

Ko`rib chiqildi:

IZLASH



[Vazirlar Kengashi](#) [Statistik va tahliliy ma'lumotlar](#)
[Vazirliklar va idoralar](#) [Shahar va tuman hokimliklari](#)
[Hujjatlar](#) [Respublika mehmonlariga](#) [Elektron hukumat](#) [Interaktiv davlat xizmatlar](#)